



НИЯТИГА ЕТИШОЛМАДИ

«ИМПОРТНЫЙ» ТЎРВА...

Янги йилнинг биринчи кунин ҳам милиция ходимлари учун осойишта кечмади. Куйбишев туманининг Черданцев кўчасида ўз хизмат вазифаларини ўтаётган милиция катта сержанти Раҳмонқул Умаров ва милиционер Фарҳод Деҳқоновларнинг диққатини субҳидамда уйқуни насия қилиб,

анчагина салмоқли юк кўтарган йўловчи тортди. Уни тўхтатиб, қопини текшириб кўришди. Ўғирланган бир неча қути турк совуни, чой сервиси ва Чехословакияда ишланган биллур қадаҳларни 35 ёшли С. Гуленко кўзлаган манзилига етказа олмади.

...ВА ФИРИБГАР БЕМОР

Шу йилнинг 9 январиди эса бош кўпмолли дўконда хизмат бурчини бажарётган милиция сержантлари Зокиржон Муҳамедов ва Жамол Музаффаровлар Томск шаҳридан хизматсафарига келган фуқаро Белла Клербертни ташвишли ҳолатда учратишди. Унинг айтишига қараганда, кундузи тахминан соат иккиларда олдида номаълум шахс келиб, 250 сўм пулини алдаб олиб кетган. Милиция ходимлари фибрибгарнинг ташқи кўринишлари ҳақидаги керакли маълумотлар асосида унинг изига

тушдилар. Навоий кўчасидаги ер ости ўтиш йўлида шубҳаланилган кишини тўхтатишди. Милиция бўлини масига келтирилганда, жабрланувчи уни дарров таниди. Фибрибгар 1-шаҳар сил касалликлари шифохонасида даволанаётган, Бектемир тумани Шамсиев кўчасидаги 18-уйда истиқомат қилувчи Д. Турдиев экан. У ўз айбига иқроқ бўлди.

Юқоридаги иккала иш юзасидан тергов ишлари олиб борилмоқда.

Ҳ. ҲИҚМАТОВ.



Бехосдан хонадон остонасидан қайгу ҳатлаганда, гувоҳ бўлинган оғир жиноят, қидирилаётган жиноятчи Ёхуд дом-дараксиз йўқолган кишилар ҳақида хабар қилмоқчи бўлинганда, телефондаги «02» рақами терилди.

— Сизни «02» эшитилади. Кечасию кундузи шундай жавоб эшитилади. Жиноятчилик билан курашдаги милиция фаолиятининг самарасини оширишда навбатчилик қисмларининг муносиб ўрни

бор. Чунки юз бераётган «жиноятларнинг изи совумасдан туриб ишга киришиш унинг очиш имкониятини бир неча қарра оширади. Куч ва воситаларни тўғри тақсимлаш эса навбатчининг тажрибаси ва маҳоратига боғлиқ.

Суратда: Собир Раҳимов туман ИИБ навбатчиси Карим Ҳошимов телефон қўнғироғига жавоб бермоқда.

Ҳабибулло ШОДИЕВ суратга олган.

«БАРЧА ПОСТЛАР ДИҚҚАТИГА!!!»

Вақт ярим тундан оғганда Тошкент шаҳар ИИБ ДАНБнинг катта навбатчиси милиция катта лейтенанти Л. Пашченко «Минералсув» постидаги ходимлардан номаълум зўравонлар 16 январь кунин соат 00.30 да «Москвич—2141» белгили 05—98 ДДА рақамли автомашинани ҳайдовчисидан тортиб олиб, кўздан гойиб бўлгалари ҳақидаги маълумотни қабул қилди. У фурсатни бой бермай тунги хизмат бурчини ўтаётган ходимларни воқеадан ҳаво тўқинлари орқали огоҳ этди.

— Барча постлар диққатига!!!

Бу сўзлар хабарни тингланган ходимларни сергалликка ундади. «Уч қарамон» ДАН постида турган милиция ходимлари Э. Раҳмонов ва М. Муродовлар катта трассада тунги зулмат қаърини ёриб келаётган ҳар бир машинани синчиклаб текширишдан ўткази бошладилар. Рақия орқали воқеадан хабар топган ДАН катта инспектори милиция катта лейтенанти Ш. Абдиев хизмат автомашинасида уларга ёрдамга ошиқди.

Тунги соат бирларда Тошкент автомобиль ҳалқа йўли бўйлаб ўқдай учиб келаётган машина уларнинг диққатини тортди. Лекин унн бошқарган кимса тўхташ ҳақидаги буйруқни назар-писандламасдан йўлни фишкўприк томонга солди.

— 05—98 ДДА... — деди рақамни илғашга аранг улгурган Ш. Абдиев.

Шу заҳоти Ш. Абдиев хизмат машинасига Э. Раҳмоновни олиб, таъқиб этишга тушди. Постда қолган М. Муродов Тошкент вилоят ИИБ ДАНБга қарашли «Фишкўприк» постида турган ҳамкасбларини ва катта навбатчи Л. Пашченкони босқинчилар тушган машина тўхтамагани, таъқиб уюштирилгани ҳақида хабардорлади.

Катта навбатчи вазиятни ҳисоблаб кўриб, ёрдамга «ВАЗ—2106» белгили 22—25 ТНБ рақамли автомашинада милиция сержантлари А. Ҳақимов ва А. Омонбоевларни жўнатди.

«Фишкўприк» ДАН постидаги ходимлар Қ. Аҳмедов ва А. Мадаминовлар билан ҳамкорликда кўрилган чора-тадбирлар туфайли тунги босқинчилар ушланди. Автомашинани 24 ёшли, яшаш жойи нотайин Шавкат Ғаниев бошқарган, унинг ёнида 30 ёшли андижонлик Иброҳим Соидов, илгари икки марта судланган, 34 ёшли когонлик Одил Норбўтаевлар бўлган.

Рамзиқдин МУҲИДДИНОВ, милиция лейтенанти.

ЎЗБЕКИСТОН ССЖ ДАВЛАТ МАДҲИЯСИ КОНКУРСИНИНГ ДАСТЛАБКИ НАТИЖАЛАРИ

Ун иккинчи чақириқ Ўзбекистон ССЖ Олий Кенгашининг биринчи сессияси фан, халқ таълими ва маданий меросни асраш ҳамда миллатлараро муносабатлар, тил ва маданият қўмиталарига Ўзбекистон ССЖ Давлат мадҳиясининг янги матнини ва мусиқасини тайёрлаш ишларини ташкил этишни топширган эди. Қўмиталар мадҳиянинг шеърий матнини тайёрлаш ва саралаш бўйича

конкурс ўтказдилар. Конкурсга беш ой давомида ёпиқ имзолар билан олти мишдан ортиқ муаллиф ўз шеърларини тақдим этди. Ҳар икки қўмита таркибига кирган Ўзбекистон ССЖ халқ депутатлари конкурс шартларига биноан, келган барча матнларни синчиклаб ўрганиб чиқдилар. Қўмиталарнинг қўшма мажлисларида конкурсга тақдим этилган матнлар атрофлича муҳокама қи-

линди ва Давлат мадҳиясига қўйиладиган юксак талаблар нуқтаи назаридан демократик тарзда саралаб олинган тўртта матн Олий Кенгаш Раёсати муҳокамасига киртилди.

Олий Кенгаш Раёсатининг мажлисида «Қўнғиртовлиқ», «Элбек» имзолари билан юборилган қўйидаги икки матнни халқ муҳокамасига қўйиш учун матбуотда эълон қилиш лозим деб то-

пилди. Келажақда кенг жамоатчиликнинг фикрини ҳисобга олган ҳолда шу муқоабил матнларнинг биттаси танлаб олинди, Ўзбекистон ССЖ Олий Кенгашига тақдим қилинади.

Бугун эълон қилинаётган муқобил матнлар ҳақидаги тақлиф ва фикр-мулоҳазалар Ўзбекистон ССЖ Олий Кенгашининг фан, халқ таълими, маданий меросни асраш ҳамда миллатлараро муносабатлар, тил ва маданият қўмиталарига (Тошкент, Намойишлар хиббонига) ёзиб юборилиши мумкин.

(ЎЗТАГ).

«ЭЛБЕК» МАТНИ

ЎЗБЕКИСТОН ЖУМҲУРИЯТИНИНГ ДАВЛАТ ФАҲРИЯСИ

Айланар Еру Кўк, айланар мангу,
Она Ўзбекистон! Ениқ чироғинг.
Озодлик ўзбекка азалий орзу,
Гувоҳдир Туркистон — қадим тупроғинг!
Аждодлар руҳига салламно!
Шуур, шуқуҳига салламно!
Офтоб диёрисан: яшнара дала, боғ,
Мардларинг сабоғи тирик, барқарор.
Жайхунинг, Сайхунинг белиннга белбоғ,
Туз-нонинг ҳалол, пок, дин-имонинг ёр!
Олов-оташиннга салламно!
Сарвар қуёшиннга салламно!
Барча эл оламда бўлсин жону тан,
Йўқолсин адоват, тенгсизлик, зулмат.
Ўзига қутлуғдир ҳар битта Ватан,
Ўзига улугдир ҳар битта миллат!
Зулм адосига салламно!
Эрклик нидосига салламно!
Пойдор бўл, элдор бўл, о, Ўзбекистон,
Ўз туғинг, ўз туғронг — бахт-иқбол, яша!
Кураш — бу мангулик, ҳақиқат ва шон,
Толенинга абад истиқлол*, яшна!
Истиқлол йўлига салламно!
Истиқбол йўлига салламно!

* Истиқлол — миллий мустақиллик

«ҚўНҒИРТОВЛИҚ» МАТНИ

МАДҲИЯ

Асрлар қаъридан келар карвонинг,
Чорлар ушалмаган орзу-армонинг.
Жаҳонда ягона Ўзбекистонсан,
Маърифат, истеъдод бўлғай сарбонинг.

Оққан дарёнг яна ҳайқириб оқсин,
Учган машъалларни мардларинг ёқсин.
Дўстга дўст, бағри кенг, меҳнатсевар эл,
Дунёда сенга ҳам бахт кулиб боқсин!

Уйғониш еллари эсмоқда такрор,
Табаррук аждодлар руҳи сенга ёр,
Улуғ даҳолари пайдо бўлган чоғ
Оламни ўзига қаратган диёр!

Оққан дарёнг яна ҳайқириб оқсин,
Учган машъалларни мардларинг ёқсин.
Дўстга дўст, бағри кенг, меҳнатсевар эл,
Дунёда сенга ҳам бахт кулиб боқсин!

Бу замин кенгга кенг, торларгадир тор,
Кўкларга учгудек қанотларинг бор.
Инон ўз кучинга, жон Ўзбекистон!
Парвозинг ҳур бўлғай, эркинг барқарор.

Оққан дарёнг яна ҳайқириб оқсин,
Учган машъалларни мардларинг ёқсин.
Дўстга дўст, бағри кенг, меҳнатсевар эл,
Дунёда сенга ҳам бахт кулиб боқсин!



Аёл... Бу сўзнинг залворли қадри, чексиз қудрати, юксак ҳурмати бор.

Аёл — ҳаётнинг давомчиси.

Аёл — хонадон тинчи, файзи, фаровонлиги қўриқчиси. Аёл васфи азалдан тараннум тожи. Мабудаларга — аёл қиёфасидаги худоларга сажда қилинганлигига кўна тарих гувоҳ. Не-не мўъжизалар аёл ша-рофати туфайли ер юзида ёдгорлик бўлиб қолмади. Қанчадан-қанча инсонларни юксакликка кўтариб, бу дунёда абадий яшаб қолишга замин яратмади.

Унинг кулгуси, наннки кулгуси, жилмайиши ҳам сонсиз бағритошларни эритиб юборади. Гул-гул чехраларидаги нафосат, латофатдан олам чароғон.

Аммо... қора шабнам қўнган чехралар ҳам борлиги, ўз айби биланми, ўзгалар айби туфайлими, билибми-билмайми, ёхуд оғир шароит сабабми юзига қора суртган мазкур аёллар қисмати билан танишиш истаги жумҳуриятимиздаги ягона аёллар колониясига етаклади.

Атрофи баланд тиканли симдевор билан ўралган бу бино шаҳарнинг ичида жойлашган бўлиб, серқатнов катта кўчадан ўтган-кетганнинг кўзига совуқ ва хунук ташланиб туради. Тўқ қорамтир кўкка бўялган темир дарвозалари ҳам, очилганда этни увиштирадиган эшик-лари ҳам кишининг кайфиятини бузиб, қандайдир бир англаб бўлмас ҳис уйғотади.

Ташқаридан бефайз, ма-вҳум кўринган деворлар ор-тида эса ўзига хос бир ҳаёт оқими кечади. Зеро, бу ерда ҳам туғилиш бор, ўсиш бор. Лекин бу ердаги туғилиш ва ўсиш ҳеч кимга шодлик, тантана бағишламайди. У ўйламай қилинган гуноҳларнинг, оқибат тортаётган ғам-аламларнинг яна давом-чисидай, тақдирнинг аччиқ инъомлари мевасидай, шун-доқ ҳам ўчмас бўлиб босил-ган тамганнинг доимий эсла-тувчисидай қабул қилина-ди.

Бугун худди мана шу та-бий ҳаётдан бир неча те-мир эшиклар билан ажрат-илган зонада чала—етти ойлик бўлиб дунё юзини кўрган Бахтиёржоннинг чил-ласи чиқибди. Ҳадемай бу ерда эмаклайдиган, қиқир-лаб куладиган, ўтирадиган, юрадиган, гапирадиган ҳам бўлади. Ундан кейинчи...

Эндигина йигирма баҳорни кўрган, ўғирлик қилиб тўрт йилга озодликдан маҳрум қилинган онаси Нури Хаи-това (исм-шарифи ўзгарти-риб берилмоқда) уни тўйиб-тўйиб бағрига боса олмаёт-ганини, оналик меҳрига қон-дира олмаётганини айтиб, юм-юм йиғлайди.

— Ешлик қилдим, аҳмоқ-лик қилдим. Ростини ўғирлик учун қамашларини билмаган эдим. Бу ерда кўп нарсалар-га тушундим. Худо хоҳласа очкичка эсон-омон чиқсам, ўғлимни одам қилиб тарбия-лайман, — деб нола чекади.

Ҳа, унинг «болам» деб чекаётган оҳ-ноласи, мени ноҳақ қамашди, деб йиғлаб-сиқташи ҳар қандай одамда ҳам раҳм-шафқат ҳиссини уйғотади.

Аммо ўғирлик учун би-ринчи эмас, иккинчи маро-таба озодликдан маҳрум қилинган бу ёқимтойгина

аёлга қараб, «ўғирлик учун қамашларини билмаганига» ишонгинг келмайди.

Навбатдаги аёл Карима Солиҳова (исми-шарифи ўз-гартириб берилмоқда).

— Мен 1960 йил Тош-кент шаҳрида туғилганман. 1979 йил Янгийул туманига кўп болали хонадонга бош келин бўлиб тушдим. Ҳа-мингиздан қолар гап йўқ, бу-тун рўзгорга иложи борича қарашар эдим. Кичик овси-ним тўйсиз тушгани сабаб-ли тез-тез жанжаллашиб ту-рардик. Шундай жанжал-ларнинг бирида икки опам

ТИКАНЛИ ТАҚДИР ТУҒРИСИДА УЙЛАР



билан калтаклаганимиздан сўнг у ўлиб қолди. Опам-лар ҳам шу ерда жазо му-датини ўтаб чиқиб кетишди. Утирганимга 6 йил бўлди, яна икки йил қолди. Эрим: «Одамлар нима гапирши-са гапиршаверсин, мен-ку сен билан яшайдиган», — дер эди ҳар келганида. Беш йил ўтиб уйланиб кетди, икки ўғлим ҳозир ўғай она билан, ўша пайтда 8 ойлик чақа-лоқ қизим, ҳозир 6 ёшда онамнинг қўлида. Бу ерда ҳар қандай ишни қилишга розиман, интизомни ҳам бузмаганман, зора буларни ҳисобга олиб, бир кун бўл-са ҳам эртарақ қўйиб юбо-ришса...

Карима кўзига қуйилиб келаётган ёшларини кўрсат-маслик учун бошини эгади. Унинг кўринишидаги қан-дайди қатъиятга, жўяли гапларига, текис терилган қошларига қараб, лабларига билинар-билинмас сурилган бўёғига, дид билан йиғил-ган сочларига зимдан назар солиб, шундай муҳитда ҳам ўзалигини сақлаб қолишга интилишини кўриб, унга нисбатан бир қадар кўнгил-чанлик сезаман.

— Кичкина ўғлим доим дастурхон устида тезроқ онажоним чиқсинлар, тезроқ ёнимизга соғ-омон қайтсин-лар, деб дуо қиларкан, — дея ўзини йиғидан тийлмай давом эттирди жувон.

Бола, болада. Унга она-жонисидан бўлак ким ҳам керак бу дунёда. Бегона шамоллардан, турли касал-ликлардан асрайдиган қал-қони ўзи ҳимояга муҳтож эканлигини у қаёқдан ҳам билсин. У яна билмайдик, онажонисининг ҳар кунини, ҳар бир қадами улар соғин-чи билан ўтишини. Кечалар-и уйқуси қочиб, тонггача минг хил кўчага кириб чи-қишини. Илгари безовта қилмаган юрагин энди ҳал-қиршини, асабларининг та-

ранг тортилишини. Яна бил-майдик, баъзан болалари-нинг сиймоси кўздан узоқ-лашиб хираллашиб кетган кунлари ўзининг ёғида ўзи қовурилишини ва яна кўп-лаб нарсаларни билмайдик.

Сухбат чоғида Карима дардларини янада кенгроқ оча бошлайди. Уни тинглар эканман, олдинги турмуш тарзига қайтаётганини, шун-ча йиллар боғлаган, юрагининг қат-қатига кўнган ҳис-лари тилига чиқаётганини сездим. Бу ерда кимга айт-син дардини...

Унинг ҳар қандай ишга розиман, фақат болаларим ёнида бўлсам бас, деб ҳар гапида «болаларим, болала-рим» дейиши менинг ҳам бағримни ўртаб юборди. Гойибона мен ҳам ўғай она қўлида қолган болалар тақ-дири ҳақида ўйлай бошла-дим. Балким, уларнинг ибо-раси бўйича «ташқарида», «очиқда» қолган болалари-нинг аҳволи жуда ҳам улар тасаввур қилганичалик аянч-ли, ўзгаларнинг раҳминни келтириб, юрак-бағрини эза-диган даражада ғариб эмас-дир. Ҳамма сингари яшаёт-гандир. Фақат онасигина етишмас.

Олти боласи «очиқ»да ич-киликка ишқибозроқ ота

ба-тазарруларини қабул қи-ладиган, ўтган даврлардаги каби руҳоний одам керакли-гини кўнглимдан кечираман.

Балким дин аҳллари улар-нинг дарз кетган имонлари-ни, бу ерда тобора сўниб бораётган ҳаётга иштиёқла-рини қайтаришда, қалблари-дан эзгулик қайта жой оли-шига ёрдам берар.

Ҳали ўн гулидан бир гу-ли очилмаган маҳкумаларга қараб, шундоқ ҳам қисқа берилган умрини тутқунлик-да ўтказайотганларига ачина-сан киши. Улар-ку бирор айби учун жазосини торта-ётгандир, бу ерда дунё юзи-ни кўрган гўдакларнинг «маҳкумлиги» нима учун?

Бутун бир дунёни шу тўрт девор деб билган, бор нарсани ташқи муҳитдан қабул қилиб оладиган, ўзи ҳам ўзгалар ҳавасини уйғо-тиб, аτροφга завқ шавқ та-ратадиган бир пайтда пешо-насига тамга босилган она-си билан колонияда бўлса...

Бу ерда болалар учун ҳамма шароит муҳайё. Ҳат-то сиз билан бизнинг болаларимизга қарагандан ҳам аълороқ қарашади. Лекин бу ердаги ўйинчоқлар ҳам «маҳкумиз, маҳкумлармиз» деб чирқиллаётгандай. Икки ёшдан ошган гўдаклар бола-лар уйига ўтказилади. Ким-дир қариндош-уруғларига бе-ради вақтинчалик. Қайси маҳкума очкичка чиққач, қай-тиб олади, бошқаси эса ор-тиқча юк билиб ташлаб ке-таверади. Шу алфоз яна бир мажруҳ кўнгил жамия-тимизда кўпаяди, тақдирлар чалкашлигича қолаверади.

Маҳкумаларнинг баъзи-лари очкичка чиққач, ҳаёт-лари қай тарзда кечини мумкинлигини тасаввур қила олмайдилар. Улар асосан борар жойи йўқ, ота-онаси «оқ қилиб», воз кечилган қизлар, аёллардир. Одамлар билан муомала қилишдан, татънаси, муҳокамаси, баҳо-сидан кўра бир жиҳатдан баъзилари шу ерни маъқул кўришади.


Қорақалпоғистон мухтор жумҳуриятининг Нукус шаҳ-рида 1946 йили туғилган Дар-мон Элмуротова (исм-шарифи ўзгартирилган) 1984 йили қотилликда қатнашгани учун ўн икки йил муддатга озод-ликдан маҳрум этилган. Очинда қийналишини, жуда ҳам кўп кўнгилсизликларга учрашини, шу сабаб бу ердан чиқишга унчалик ҳам интилмаётганини айтади.

Дарҳақиқат, уларга қийин бўлади, ҳозир ҳар кунини бў-либ турган ўзгаришларга қўнма олмади, ўзлаштириб ололмади бизлар қийнала-ётирмиз-ку.

Улар бутунми, эртами бизнинг қаторимизга қўши-лади. Орамизда оёққа ту-риб, инсоний ҳаёт кечирши-лари кўп жиҳатдан бизга ҳам боғлиқ. Қўёш тафтидан ҳам ҳароратлироқ меҳр ва самимиятимиз бу юзларга қўнган қора шабнамни кў-тариб юбориши муқаррар.

Бу ердан оғир ўй-хаёл-лар билан чиқиб кетар экан-ман, уларнинг адашган йўл-ларини топиб олишларини истаб қоламан.

Муҳаббат ИБРОҲИМОВА.



Суратларда: (юқорида) боғчанинг олти ойлик тарбияланувчиси Наумруда; (пастда) тарбиячи Вера Ро-

маненко икки ёшли қизча билан. Суратларни Ольга Журавлёва олган.

ЙИЛДА БИР ТАЁҚ ОТАР

Уйда беҳуда ўқотар қурол сақлаш оқибати хунук туғаш-и ҳеч гап эмас. Айниқса, милтиқ жаҳли чиққанда ақл жиловини йўқотадиган киши қўлига тушиб қолса. Қора-қалпоғистон мухтор жумҳу-риятининг Қўнғирот шаҳрида-ги «Автотеххизмат» бекати чилангари, илгари судланган 44 ёшли К. Алимбетов маст ҳолатда хотини билан ги-жиллашиб қолди. Алам ўти-да ёнган К. Алимбетов 1 ян-варь кунини кечқурун соат ўн бирларда қўлига милтиқ олиб, ўғай қизи 12 ёшли Д. Қолбоевани отиб қўйди.

Жаҳл устида оғир гуноҳ содир этганидан ваҳимага тушиб, кейинги ўқ билан ўзини ҳам ўлдирди.

2 январь кунини Фарғона шаҳридаги Оқариқ кўчасида тунги соат иккиларда гум-бирлаган милтиқ овози осу-да уйқу оғушига чўмган ки-шилар тинчини бузибгина қолмади. Ундан узылган ўқ шаҳар ёғ-мой жувозхонаси-нинг ишчисини 28 ёшли М. Умурзоқовни қорнидан оғир яралади. Кўрилган чоралар туфайли жазоланадиган қил-мишга қўл уришда гумонла-наётган кишининг шахси аниқланди.

СОХТА ЙЎЛОВЧИ

Бирон-бир уловга кўз ти-киб, катта йўлда қўл кўтар-гандан нами йўқ. Улар ора-сида ҳайдовчига жарақ-жарақ ақча ваъда қилиб, оши-қайтган жойига элтиб қў-йишни сўрайдиганлар ҳам учраб туради. Чўнтагига ту-шай деб турган пулни кўзи қиймаган машина эгаси кўн-са бас...

Сурхондарё вилоятининг Денов туманида яшовчи 52 ёшли Д. Чўянов 4 январь кунини кечқурун соат ўн бир-ларда уйдан касалхонага келтирилган. Кечагина етти мучали соғ одамнинг илкис-дан эмчилар (врачлар) ёр-дамига муҳтож бўлганининг сабаби бор, албатта. Ҳа-минг айтишига қараганда, кечқурун соат саккизларда Денов шаҳрида «ВАЗ-2106» белгили машинасига тўрт кишини ўтказган. Йўловчи-лар «Сурхон» давлат хўжа-лиги худудига боришларини айтишди. Бироқ машина ша-ҳар ташқарисига чиқини бил-дан уларнинг нияти бузил-ган. Ҳайдовчи бошига пичоқ уриб, машинадан тушириб юборишган.

Сохта йўловчилар Самар-қанд туманилик М. Ража-бовни ҳам қақшатишди. 3 январь кунини кечки соат ет-тида Самарқанд шаҳрида икки номаълум киши ундан Муборак кўчасига ташлаб қўйишни илтимос қилди. Ай-тилган жойга етиб келгач, йўлқира тўлаш ўрнига ҳай-довчинини орқа ўриндиққа ўт-қазинди. Сўғдиёна даҳасида эса М. Ражабовдан 5 минг сўрашиб, номаълум тараф-га қараб йўл олишди.

Милиция йўловчи қиёфа-сида соддадил ҳайдовчилар-ни талаган босқинчиларни қидирмоқда.

Ғ. ЖУРАЕВ.

Борис ВАСИЛЬЕВ

Дурдоначилар қайтарилши



(Давоми. Боши аввалги сонларда)

(ҚИССА)

Ҳажмдаги тахталарида сон-саноқсиз чўтка, елими ва лаки аллақачон қуриб бўлган шиша идишлар, тери парчалари, ранг-баранг фольганинг қийқимлари ва бошқа майда-чуйдалар сақланарди. Кейин қуёш нурлари эски-туски қалашиб ётган бурчакка қадалди. Роса чорак соатдан сўнг яқинда дераза рўпарасида қад кўтарган би-но ортига яширинди.

Таъмирлаш устахонасининг аввалги бошлиғи борлигида қария Ревзин билан бировнинг иши йўғиди. Катта мажлислар бўлса бас, вилоят маданият бошқармаси бошлиғи уни ибрат қилиб кўрсатарди. Бошлиқ ўзгарди-ю, кекса таъмирчи янги раҳбарлар дидига тўғри келмай қолди. Энди ҳаммаси тез ҳал бўларди: буюртмалар лаҳзалар ичда қабул қилинар ва тайёрланарди. Кўпича иш сифати яхши бўлмасди. У эса ҳар доимгидай шошилмай, қунт билан ишларди. Устахонада уни қимирлаб қир ошар дейишарди. Кўп ўтмай Ревзин нафақадорликка чиқди.

Лекин ҳўжайинидан узоқлашолмайдиган, ўткинчилар яқинлашганда, қўрққанидан унинг оёғига ёпишган дардманд итига ўхшаб на кўчада, на ҳовлида ўзини қўйгани жой топарди.

Ҳовлида уни нотаниш, ваҳший цивилизациялик келгиндилар, қўшни уйда турувчи, ўзларни норасмийлар деб номлаган исқирт, бақироқ, жирканч, новча йигит ва қизлар ҳоли-жони-га қўйишмасди.

Улар билан нима иши бор. Уни охириги қуиларда қийнаётган воқеа юз бермаганда, балким милицияга бориб ҳам ўтирмасди. Буни ҳовлидаги ўсмирларга алоқаси йўқ. Шахсий араздан жиддийроқ нарсаси. «Мабода ўйлаганимни амалга оширмасам,— мулоҳаза юритарди Ревзин,— бир умр қўриқиб юрганымдек, қўрқаман, демек, у ҳолда ҳалол инсон эканлигимни ўзимга исботлаш учун сарфлаган куч-ғайратим бефойда».

(давоми бор)

Сирдарё вилоятининг Оқолтин ноҳиясида халқ дружиначиларини моддий рағбатлантиришмоқда.

Жиноятчилик билан курашни кучайтириш борасида Оқолтин ноҳия ички ишлар бўлими жамоаси бир қанча ишларни амалга оширмоқда. Натижада бу йил ноҳиямиз ҳудудида жиноятлар сонининг камайирилишига эришдик.

Бўлимимиз жамоат ташкилотлари фаоллигига ва таъсирчанлигига алоҳида эътибор бермоқда. Чунки бундай катта кучга таянмаслик олдиндан кураш самарасини сусайтириши турган гап. Шунинг учун ҳам ноҳиямизда кўнгилли халқ дружиначилари уюшмаси тузилди. Бизга Херсон вилоятининг Новая Каховка шаҳридаги тажриба туртки бўлди.

Уюшма ташкил этилмасдан олдин туманимиз ҳудудида халқ дружиначиларининг фаолиятини яхшилаш борасида кўпгина ишлар амалга оширилди. Лекин кўзлаган натижага эриша олмадик. Шундай бир пайтда Новая Каховка шаҳри жамоатчилигининг кўнгилли халқ дружиначилари фаолияти самарадорлигини ошириш борасидаги иш тажрибаси ҳақида хабардор бўлдик. Биз мана шу янгиликни ноҳия Кенгаши ижроия қўмитасида муҳокама этдик ва уни қўллаш йўлларини излаб топишга ҳаракат қилдик.

Ноҳиямиздаги барча ҳўжалик ва ташкилотларнинг раҳбарлари, бош ҳисобчилари, касабга уюшмаси ташкилотларининг раислари, қишлоқ Кенгашлари раислари ноҳия ижроия қўмитасига таклиф қилиниб, кўнгилли халқ дружиначилари уюшмасини тузиш масаласи кўриб чиқилди. Ушбу уюшма Низомига кўра давлат банкида махсус ҳисоб очилиб, унга ҳар бир ташкилот ўзида ишлайдиган одамлар сонига қараб, киши бошига 10 сўмдан пул ўтказиши кераклиги белгиланди.

Агарда ҳамма ташкилотлар очилган ҳисобга шу тартибда пул ўтказишса, 150 минг сўм пул тўпланарди. Шунда навбатчиликка чиққан халқ дружиначиларига ҳар соатига 1 сўм 50 тииндан пул тўлаш имконияти туғиларди. Бундан ташқари уюшма жамоат тартибини сақлаш таянч пунктларининг ремонтини, уларни керакли жиҳозлар билан таъминлашни ҳам ўз зиммасига олади. Низомда уюшмага қабул қилиш ва ундан чиқариш тартиблари ҳам кўрсатилган. Уюшмага, албатта, меҳнат

САМАРАЛИ ЙЎЛ

жамоаси йўлланмаси билангина қабул қилинади.

Уюшма Низоми ушбу йиғилишда тўла маъқулланди ва халқ депутатлари ноҳия Кенгаши ижроия қўмитасининг қарори билан тасдиқланди.

Сўнгра меҳнат жамоасининг йиғилишлари ўтказилди, йиғилиш қарорлари ижроия қўмитасига тақдим этилди. Кўнгилли халқ дружиначилари Уюшмаси ўтган йилнинг июль ойидан иш бошлади. Ҳозирги кунда унинг сафида 102 нафар ишчилар, ўқитувчилар, меҳанизаторлар, инженерлар ва бошқа касб эгалари бор. Ўтган давр ичда кўпгина ишлар амалга оширилди. Ҳар куни кечқурун соат саккиздан бошлаб дружина аъзолари участка инспекторлари билан биргаликда белгиланган маршрутлар бўйича навбатчиликка чиқишмоқда. Жамоат жойларида, кўча ва хиёбонларда тартибни сақлашда ички ишлар бўлими ходимларига бераётган ёрдамлари кўзга ташланиб турибди.

Уюшма ўз ҳисобидан барча таянч пунктларига рақия

ўрнатиш учун 14,5 минг сўм пул сарфлади. Ўтган давр мобайнида халқ дружиначилари томонидан 12 та майда ўғирлик, 18 та майда безорилик аниқланди. Жамоат жойларида маст ҳолатда юрган йигирма бир киши милиция бўлимига келтирилди. Бундан ташқари У. Юсупов номли давлат ҳўжалиги дружинасининг аъзолари ўғирлаб кетилган давлат автомашинасини ушлашда жонбозлик кўрсатдилар. Айниқса, Бутуниттифоқ қидирувида бўлган жиноятчини қўлга туширишда Ворошилов давлат ҳўжалигидан Зоир Нарзуллаевнинг кўрсатган жасорати таҳсинга лойиқ.

Кўнгилли халқ дружиначилари Уюшмасига ноҳия халқ таълими бўлими ходими, спорт усталлигига номзод Норбобо Соатов бошчилик қилиб, дружина аъзолари билан ҳўқуқий мавзуда ва жисмоний тайёргарлик бўйича машғулотлар олиб боришни йўлга қўймоқда.

Кўнгилли халқ дружиначиларининг фаолияти ҳафтада бир марта ҳўқуқ идоралари билан биргаликда кўриб чиқилиб, янги вазифалар белгиланмоқда. Уюшма ўзининг кундалик иши билан халқ орасида бир қадар ҳўрмат ва обрў орттирди.

Халқ дружиначилари уюшмасини жумҳуриятимизнинг ҳар бир ноҳиясида, ҳар бир шаҳарида ташкил этса бўлади. Бу шароитга қараб ҳар хил шаклда бўлиши мумкин. Турган гапки, аввало, изланиш, халқнинг жамоатчилигининг жиноятчиликка қарши кураш борасидаги фикрини ўрганмоқ лозим. Ишончимиз комилки, осойишталикни, тинчликни сақлашга омма орасидаги ташаббускорларни фаол жалб қилиш қувончли самара беради. Ноҳиямизда янгилик натижалари шунини кўрсатмоқда.

К. ҚУЛДОШЕВ,

Сирдарё вилояти Оқолтин ноҳия ички ишлар бўлими бошлиғи ўринбосари, милиция майори.

ТОВЛАМАЧИЛИК ДАРДИГА ЙЎЛИҚҚАНЛАР

9 январь куни кундуз соат ўн иккиларда шаҳар ички ишлар бошқармасига кириб келган ТошДД талабаси Акмал Раҳимқулов номатлум йиғитлар уни жисмоний куч ишлатиш билан қўрқитиб, 1,5 минг сўм пул талаб қилишаётганини айтди. Жиноят қидирув бошқармаси ходимлари таклифи билан А. Ра-

ҳимқулов айтилган миқдордаги пулни товламачилар қўлига тўтқазишга рози бўлди. 10 январь куни тушки соат бирда Ҳамид Олимжон майдонидаги «Семург» емакхонаси яқинида пулни олиш чоғида «Қайтахомашё» зичловчиси 23 ёшли Шамсиддин Аҳмедов, халқ ҳўжалиги олийгоҳи талабаси 24 ёшли Руслан Жовлиев, 24 ёшли

бекорчи Фарруҳ Яхъёевлар ушланди.

Ҳозир товламачилик балосига мубтало бўлганлар ҳатти-ҳаракати юзасидан тергов ишлари олиб борилмоқда. Шунинг учун ҳам жабрланувчи ва айбланувчиларнинг исм-шарифларини ўзгартириб бермоқдамиз.

С. СУЛАЙМОНОВ.

ТИЛСИЗ ГУВОҲНИ СЎЗЛАТИБ

Жиноят содир этилди. Фожеа юз берган жойга оператив тергов гуруҳи етиб келди ва унинг таркибидеги ҳар бир ходимнинг ўз ўрни бор. Кимдир жиноят қидирув оператив вакили, бошқаси эса терговчи ва... яна бири шундай мутахассиски, жиноятчи изини аниқлашда усиз иш битмайди. Бу эксперт-криминалистдир.

Криминалистика соҳаси фақатгина из қидириш билан шуғулланади, деган фикр унчалик тўғри эмас. Бир пайтлар ёғоч ўлчагич билангина қуролланиб «ибтидоий»ча иш юритган криминалистика, бугунга келиб жиноятчиликнинг энг чигал масалаларини ҳам еча оладиган бутун бир фанга айланди. Криминалистика ўз тараққиёт кечимида физика, кимё, биология, машинасозлик, электроника, руҳшунослик, мантиқ ва бошқа бир қанча фанларнинг энг янги ютуқларидан фойдаланган ҳолда ўз тажрибаларини бойитмоқда.

30-йилларнинг машаққатли кунларини бир эслайлик. Вишневскийнинг инсонпарварликка қарши бўлган сиёсати ҳар қадамда ишга тўсқинлик қилаверарди. Уша даврларда айбланувчи айбига иқдор бўлса бас, унинг жинояти исботланган ҳисобланарди.

Ҳозирда эса суд айбланувчига криминалистика экспертизаси ҳулосасиз айблов ҳукмини чиқара олмайди. Кўп

ҳолларда бундай ҳулоса гумондорнинг айбини исбот қилиш учун ягона далил бўлиб ҳисобланмоқда.

Жиноятчилар бу ҳақда билладилар, шунинг учун ҳам из қолдирмасликка ҳаракат қилдилар. Турли хил найрангларни ишлатадилар. Фикрининг исботи учун бир мисол келтирмоқчиман. Янгийўл шаҳрида қотил опа-сингилни ўлдириб, ҳамма ашёвий далилларни йўқ қилади, пиюқни ҳам ташлаб юборади. Бармоқ изини қолдирмаслик мақсадида буюмларни артиб чиқади, қон теккан кийимларни эса ёқиб юборади.

Жиноят содир бўлган жойни текшириш учун келган криминалистар кўз илғамас далилни топишга муваффақ бўлдилар. Муқаддам икки марта судланган шахс айбига иқдор бўлди ва тегишли жазосини олди.

Шуни ҳам таъкидлаш лозимки, бундай жиноятларни очиш биз учун унчалик қийин эмас. Кўп ҳолларда жиноятчи «иш» қилаётиб ўз хавфсизлигини таъминлаш мақсадида қўлқопдан фойдаланади. Уларини адашганликларини эса қўлларига кишан тақилгандан кейингина билладилар. Улар биринчи навбатда ҳар бир

одам такрорланмас шахс эканлигини билишмайди. Сўлаги, сочи, ҳиди ҳар хил бўлади. Замонавий техникага эга бўлган криминалистар махсус асбоб ёрдамида ҳидни бир неча йилгача сақлай оладилар. Киши ўзи кирган хонадаги ҳар хил китоб, мебель ва бошқа буюмларнинг ҳидларини ўзига қабул қилиб олиш билан биргаликда, у жойда оёқ кийимидаги чанг зарралари, тупроқни қолдиради.

Криминалист эса мана шу нарсаларни йиғиб олиб, уларни «гапиртирса» бас. Бу масалада унга ҳозирги замон техникаси, шў жумладан компьютер ва лазер асбоблари ёрдам беради.

Юрий МАРДАНОВ, УзССЖ ИИВ бўлим бошлиғи ўринбосари, милиция майори.

Тошкент шаҳар ижроқўми ички ишлар бошқармасининг эксперт-криминалисти-

ка бўлимида Наталья Добренко кўп йилдан бери сидқидилдан хизмат қилиб келмоқда. У ўз иш фаолиятида бир қанча оғир жиноятларнинг очилишига катта ҳисса қўшган. Шошилинч топшириқларни эса вақтида удаллаб, жиноят қидирув ходимлари вазифасини енгиллаштиради. Шу боисдан уни тажрибали эксперт сифатида ҳўрмат қилишади.

Суратда: милиция капитани Наталья Добренко далилий ашёни кўздан кечирмоқда.

Александр КОШКИН олган сурат.



Халқимизда қадим-қадимдан чакки қадам босганини иза қилиш билан тарбиялаш одати бор. Меҳнат кексаси Маҳкам Ҳақимов қаламга олган воқеа донишманд кексанинг ўғрига берган сабоғи ҳақида. Келинг, биргаликда воқеа тафсилоти билан танишайлик.

Узоқ вақт қадоқ қўли ва пешона тери эвазига рўзгор тебратган Халил ота олмишни қоралаганда, уни корхона аҳли зўр иззат-икром билан кексалик нафақасига қузатди. Меҳнатга ташна ота кўп ўтмай ўтириб зерикди. Қулардан бир куни кампирга сўз қотди.

— Рихсинисо, бу бекорчилик қурмағур одамни адоин тамом қиларкан-ку. Тараллабедодчиларга тўзим берсиней. Ке, нафақамиздан жамлаб, битта қўй олсак. Кейинги йил пайғамбар ёшига тўлганимда, юртга ош берсак. Нима дейсан?

— Жуда яхшида, дадаси. Қайси куни куёвимиз хабар олгани келган экан. Номозжумага чиқиб кетганингиз. У ҳам дадам пайғамбар оши берсалар, бир томонини кўтарамиз, деб қолди барака топгур.

— Бўлмаса келадиган бозор қўйни олиб чиқавераман.

...Халил ота яхши ният билан олган қўйни кўча эшик атрофидаги ариқ лабида ўтлатиб юрганда, қўшнисини Ҳамдам ота чиқиб қолди.

— Халилбой, меҳнат хуморини қўй боқиб қочиряписизми? Семирганда, ошга босасизми?

— Э, албатта, келгуси йили пайғамбар ошига атаб сўямиз.

ИЗЗА БЎЛГАН ЎҒРИ

— Яхши, илоҳим ниятингнига етинг.

...Эрта баҳор икки қўшни чақчақлашиб, қўйни ўтлатишга келишди, қўшни маҳаллалик Комил ўғри шапқасини кўзига бостириб ўтиб қолди. Лабининг четига қистирилган сизарета тутунини пуфларкан, қарияларга сездирай кўз қири билан этига эт қўшаётган қўйга назар ташлади.

У анча нарига кетгач, ҳушёр Ҳамдам ота суҳбатдошидан сўради:

— Хўв, анови шапқали йигитни танийсизми?

— Ҳа, нариги маҳалладан бўлади. Отаси зап ажойиб одам эдида. Раҳматлик ёш оламдан ўтиб кетди.

— Отаси йўқлигидан бўлса, керак бироз эгри қадам босади. Қўйга ҳам зимдан қараб қўйди, чамамда. Эҳтиёт бўлинг, тагин тунда келиб, а...

Халил ота пинагини ҳам бузмади.

— Авваламбор, худо, Сизнинг пойланг. Ўғри бир пойлайди.

Саҳарлаб номозни ўқиб бўлгач, Халил ота қўрага қараб юрди. Не кўз билан кўрсинки, қўй жойида йўқ.

Кампири тайёрлаган нонушта ҳам томоғидан ўтмаган Халил ота каллаи саҳарлаб Комил ўғрининг уйига томон йўл олди. Ҳассаси учи билан эшикни тақиллатмоқчи эди, очилиб кетди.

Тўғридаги ишжом тагида сўйилган қўй терисини шила-

ётган Комил ўғри пичоғини қўйиб, очиқ чехра билан оппоқ соқоли ўзига ярашиб турган Халил ота олдида чошиб келиб, қуюқ салом берди.

— Ота, юқорига ўтинг. — Комил меҳмонни айвонга тўшалган тўшакка ўтиришга таклиф қилди.

Халил ота у узатган пиёладаги чойдан бир хўплаб, сўйилган қўйга қараб қўйдида, бошини сарак-сарак қилди.

ТУРМУШ САБОҚЛАРИ

— Ўғлим, эшигингни тақиллатай десам, ўз-ўзидан очилиб кетди. Хафа бўлмагин, тагин.

— Хафа бўлган ўзбек эмас, отахон. Ўзи очиқ эди, келиннингиз гузардан нон олиб келишга чиққанди.

Халил ота пиёладаги чойни ичиб бўлиб, бўш пиёлани мезбонга узатиши билан уй соҳибаси Қутбинисо қўлида хариди билан кириб келди. Ота билан сўрашиб, иссиқ нон ва қаймоқни дастурхонга қўйиб, эридан ўпкалади.

— Суви қочган нон ушатибсизда.

— Вақтида келиб, ҳижолатдан қутқардинг, ойиси.

Халил ота ушатишдан нондан қаймоққа бир-икки марта ботириб егач, уларга қарата деди:

— Сийлаганларинг учун катта раҳмат, болаларим.

Сизларни худо сийласин. Энди, ўғлим, кўнглингга олмасанг, сенга битта гапим бор.

— Кўнглига олиш йўқ, отахон.

— Мени танийсанми? — Йўқ, танимай турирман.

— Ана, холос. Ҳали танимаган одамни шунчалик ҳурмат қиляпсанми?

— Отахон, ўтганлар айтишган экан: «Ёшмисан, кексани сен ҳурмат айла, ўзинг ҳам қарийсан, ҳозирдан ўйла» деб. Ҳурмат қилса арзийдиган киши кўринасиз, қаерликсиз?

— Мен, болам, қўшни маҳалладанман. Анови сен сўйган қўй меники бўлади, менга жуда катта ёрдамнинг тегдида.

Комилнинг кўз олди қоронғилашиб, аранг ўзига келди.

— Ие, мен аҳмоқ, келиб келиб Сизни хафа қилиб қўйибманда. Мени кечиринг.

— Ундай деб, ўзингни хўпам қўйнаверма, болам, гапимнинг давомини эшитгин.

— Хўп, отахон, қулоғим Сизда.

— Менга ёрдамнинг тегди, деганимнинг маъноси шуки, мен қўйини сўйдириш ниятида қассоб излаб юрүвдим. Сен тунги ширин уйқунгни бузиб, қўйни олиб келибсан, тагин сўйиб ҳам қўйибсан.

Бир мусулмоннинг бошқа мусулмонга ёрдами шунчалик бўларда. Қўй сўйишинг-

ни билганимдаку, сени келиб ўзим олиб кетардим.

Комил ўғри аъзойи баданини совуқ тер босаётганини сездирамликка уриниб, ўзини тутиб гапирди.

— Отахон, ҳозир терисини шилиб бўламанда, калла-пачалари-ю, гўштини қопга солиб, уйингизга элтиб бераман.

Бироз вақт ўтиб, Комил калла-пачалар ва терини бир қопга, гўштини бошқасига жойлаштираётганда, Халил ота уни имо билан тўхтатди.

— Ўғлим, хизматинг бор.

Бировнинг ҳақидан қўрқаман. Орқа сонидан бирини ажратиб ол, келиним билан мени дуо қилиб ёйсанлар.

Комил ўғри аранг гўлдиради.

— Йўқ, ололмайман.

— Унда мени хафа қилиб қўясан, ол, болам.

Хийла тортишувдан сўнг Комил рози бўлди.

Улар Халил ота уйига яқинлашганларида, қаердандир келатган Ҳамдам ота қаршиларидан чиқиб қолди.

— Ҳа, Халилбой, қаердан сўраймиз.

Комил бўзариб Халил отага тикилди. У бўлса, пинагини бузмай жавоб берди.

— Бозорга чиққандим.

Хўв, анови ергача таксида келүвдим, бузилиб қолди. Юкни тушириб, буёғига қандай етиб оламан деб турувдим, мана, Комилжонни худо етказди. Умридан барака топсин, кўтаришиб келяпти.

Комил ўғри Халил ота уйдан чиққач, катта кўча бўйлаб енгил одим ташларди.

Маҳкам ҲАКИМОВ.

САВОЛ БЕРИНГ, ЖАВОБ БЕРАМИЗ

ПОСТНИНГ НАФИ КАМ ЭДИ

Коммунистик туманига кираверишда ДАН пости бор эди. Негадир шу пост олиб ташланди. Агар «сир» бўлмаса, сабаби нимада!

Б. МАҲКАМОВ,
Т. РУЗИЕВ,
автоҳаваскорлар.

ЎзССЖ матбуот маркази ходими Қ. Муҳаммаджонов бунга шарҳлаб беришни Тошкент вилояти Коммунистик тумани ИИБ ДАН бўлимига бошлиғи, милиция майори Усмонови Усмоновдан илтимос қилди.

— Бу ерда ҳеч қандай сир йўқ. Маълумки, туманимиз ҳудудидан иттифоқ миқёсидаги Тошкент-Чирчиқ автомагистрала ва жумҳурият миқёсидаги Тошкент-Чирчиқ йўли ўтган. Бу йўлларда содир этилаётган автомобиль фалокатларининг 50 фозидан ортироғи «четдан келган меҳмонлар» ҳисобига тўғри келарди.

Биз диққатимизни шунга қаратдик. Юқориди тилга олинган постда тўрт киши навбатчилик қиларди. Ўйлаб қарасак, ушбу постнинг йўл ҳаракати хавфсизлигини таъминлашда нафи сезиларли эмас экан. Шундан келиб чиқиб, бу ДАН постидан воз кечдик ва тўрт ходимнинг хизматици транспорт қатнови жадаллиги ва йўлдаги қўнғилсиз воқеалардан келиб чиққан ҳолда ташкил этдик.

«ПОСТДА» — («НА ПОСТУ») Орган коллегия МВД УзССР

Индикс: 64615



Андижон трикотаж ишлаб чиқариш бирлашмасининг дарвозасидан чиқиб кетаётган бешта контейнер ортилган 56—79 АНД рақамли автомашина ҳужжатларни текшириш учун Андижон шаҳар ИИБ соқчилик бўлими ходимлари милиция майори Б. Жўрабеков ва милиция старшинаси Н. Мирзаевлар томонидан тўхта-тилди.

Машина ҳайдовчиси Эргаш Ботиров тайёр маҳсулотлар омборидан олиб кетилаётган юклар учун ҳужжат кўрсатолмади. Шундан кейин соқчилик бўлимининг ходимлари БХСС ходимларини таклиф қилишга мажбур бўлишди. Бундан хабар топган омбор мудирини

ҲУЖЖАТНИ ЮТОЛМАДИ

Хайрулло Ҳабибуллаев олдинга дўқ уриб, милиция ходимларига ҳали кўрсатиб қўйишини айтди. Оғиз полволик ўтмагач, куч ишлатишга тушди. Чорасиз қолганини англагандан сўнг контейнердаги молларнинг қандайдир рақамлар ёзилган ҳужжати йиртиб ташлашга улгурди ва қолган қисмини йўқ қилиш мақсадида ямлаб ютишга ҳаракат қилди. Бунга соқчилик бўлими ходимлари йўл қўймадилар Юрагига гўлгула тушган омбор мудирини

бости-бости қилиш ниятида 5 минг сўм «совға» ваъда айлади.

Х. Ҳабибуллаев қанчалик қаршилик кўрсатмасин, БХСС, соқчилик бўлими ходимлари бирлашма вакили иштиракида контейнерларни очишди. Унга жойланган молларнинг қозғолари текширилганда, бирлашмада тўқилган 30 минг сўмлик тўр маҳсулоти талон-тарож йўли билан олиб кетилаётгани аниқланди.

Революция ҲАСАНОВА.

ОБУНА ДАВОМ ЭТМОҚДА

Муҳарририятга келатган кўплаб мактубларда, телефон орқали бўлаётган мулоқотларда рўзномасеварлар «Постда»га обуна бўлишдан кечикканликларини билдиришмоқда.

Уларга шунини маълум қиламизки, шу йил 8 февралгача рўзномага обуна бўлганлар хонадонига 1 мартдан бошлаб «Постда» кириб боради.

10 ойлик обуна нархи — 13 сўм. Рўзноманинг обуна рақами — 64615.

Муҳаррир
З. ОТАЕВ.

МАНЗИЛГОҲИМИЗ: 700029, Тошкент, Лопатин кўчаси, 1.

Ўзбекистон Компартияси Марказий Қўмитаси нашриётининг Меҳнат Қизил Байроқ орденли босмаханаси. 700083, Тошкент, Ленинград кўчаси, 32.

Рўзнома офсет усулида, А-3 қолипда босилган.

Зак. 4748.

Телефонлар: Муҳаррир — 32-38-86, муҳаррир ўринбосарлари — 39-77-23, маълумотлар учун — 39-70-40.